

戎政典第四十六卷

兵制部彙考三十二

明十三

神宗萬曆元年定軍職差委武舉俸糧軍功陞賞又定各鎮防守兵馬之制清查京營班軍各營官舍軍餘入操及題准軍戶軍伍諸例按明會典凡考定官員俱要在任分理兵政非有緊急軍情不許擅差在京者免其上直赴操若係在營隨差之數卽令替回其餘除馬政帶管外如屯田領班操備巡鹽捕盜管局運糧備倭等項一體考選量才委用前項雜差官員在任之日許令公座愈書一應文案不許干預其他軍政以外跟隨鎮守守備內外等官大小軍職不許營求軍政考選已定者亦不許營求跟隨有妨軍政萬曆元年題准通行各撫按衙門凡考選軍政以印屯爲主擇有心計堪以幹濟者先註各衛所掌印管屯有膂力堪以抗禦者定委各路管軍其次乃以充各衙門旗牌差遣不得越次取用其見在督撫鎮巡各道役使者止許量留數人餘皆發回聽委印屯之用其掌印管屯官果有盡心幹理於軍政屯務有裨者撫按官卽與保薦兵部登記將材簿內遇有守備

把總坐營員缺酌量相兼推用 凡武舉中式應加米數月支三石萬曆元年題准中式武舉官生若委用之後已經革任後復推用雖在年限之內不得復支武舉米石告養病者病痊之後如係支過五年之外才力雖堪但許聽候推用所加米石難復開支其餘未經推委或回部聽候別用者與無薦舉同俱扣至十年而止 凡各處監比萬曆元年題准比試不中候及二年例應再比除北直隸山東山西河南遼東照舊外在南京各衛所聽南京兵部照例會同南京中軍都督府在雲南等十省及南直隸衛所類送御史公同該都司及各該守巡道比試中式者列爲等第卽填原給號紙用印鈐蓋准其開俸造冊繳部查考不中者如例行 凡頭功奇功官軍人等萬曆元年題准果能奮勇先登摧鋒陷陣雖無斬獲卽論奇功列之上等乘夜砍營斬取首級得以併敘如隨後斬取殺死賊級及零碎老弱俱爲次等巡按御史覈勘分別大敵小敵大勝小勝上等擬陞願賞者從厚次等擬賞不許一槩擬陞 又按會典薊鎮車營萬曆元年議准山海附石門爲十路每路各立一車營昌平三路共立一車營每營亦駐騎步兵各一枝密雲遵化三屯設三輜重營每營亦駐騎步兵各一枝又令各標各路車營加馬匹 遼東入衛兵萬曆元年題准遼東寧前中前所孤危尤甚將

入衛遊擊兵馬除前留五百名外再留三百名仍於密雲標下遑兵一千名內量撤二百名共湊一千名之數令中前所遊擊統領操練以備戰守 保定城堡萬曆元年題准馬水口紫荆倒馬等關地方建空心敵臺三百五十六座 保定車營萬曆元年題准保定各立車營配以精兵壯馬每營務足三千 薊鎮入衛兵萬曆元年題准大寧山東河南都司班軍戍薊鎮者有一衛分春秋兩班亦有分隸各都司下令各歸併每衛止隸一都司下定爲春班或秋班撤防之日各都司管營統領到該駐劄地方雙月操練各該巡撫兵備閒亦閱操其都司亦量撥軍伴應付上班之期撫道稽查催督如出征例 薊鎮城堡墩牆萬曆元年題准灤河以東居庸以西及松棚諸路再增臺二百座又議准曹家寨將軍臺地跨山橫築內城守以七臺 湖廣城堡萬曆元年題准襄陽府光化縣治逼臨漢江城垣半圯移建於去縣三里之北集街 南直隸兵馬萬曆元年題准圖山三江二總控禦海口復原額各總八百之數前項軍餘俱掣赴鎮江操演與京軍更番防禦瓜洲驍勇腳兵精選四百名一併操備 凡輪操萬曆元年議准凡班軍缺額領班都司催取名糧與劄付官管領隨軍解部每糧一分卽准軍一名通論分數以行叅罰其缺軍分數在衛所原少則照例叅究該都司衛

所掌印官及守巡兵備若途在京脫逃則專叅各劄付官及領班都司若有司微解錢糧不前以致班銀拖欠聽撫按叅奏處治又題准改山東河南領班官爲署都指揮僉事中都領班官爲署副留守與各司軍政僉書一體管事每遇該班內輪一員領軍赴京操備回日嚴督各衛所掌印官清查軍伍又議准山東濟東兗三府境內衛所官軍邊操旣屬秋班京操俱併春班青登萊三府境內衛所官軍邊操旣屬春班京操俱併秋班二十四衛共省劄付官二十四員又革去押解官二十四員裁革都司僉書一員京操劄付官與在衛巡捕官相輪邊操千把總與在衛管操官相輪以均勞逸凡選補萬曆元年議准將改昭陵及擊去守衛者各營於分屬衛所官舍軍餘內召補一體收糧入操又按會典凡根捕逃軍萬曆元年題准凡有軍在逃不分是否五百里內各衛所一面照舊填單送部一面徑報二司清軍道批府清軍官覈實轉呈清軍御史如無清軍御史呈接管巡按御史就近拘補俟部單到日如已解伍填簿繳單聽查未解則嚴限清勾務在速補並不許各該衛所移文有司徑自勾提如違叅究凡禁止妄勾萬曆元年題准凡清軍御史務督清軍官遵照先

今事理將應解軍丁查與軍冊相同嚴行勾解其挨無名籍及丁盡戶絕經勘五次以上及義男女

增與用價承買軍產人等不得一槩混勾 凡改編調衛萬曆元年題准凡新充終身軍伍改編及

充發薊鎮軍士立限赴部掛號以憑查考類行入冊及將改編軍士行原衛開除名伍免一軍二役之弊 凡就近充發萬曆元年題准凡新充終身軍伍須分附近邊方極邊三等附近則就近各省

邊方與極邊南人則盡數編發南方其有南人係北方衛所調衛軍士與南人占籍北方者亦一體編發薊鎮則不在南人就南之例 又按會典凡清理軍伍萬曆元年題准凡清軍御史直隸責兵

備道各省責清軍道置實收實除簿各一扇遇有解到軍丁或軍犯即將申解來歷招由略節及人丁事產填註實收簿內隨行該衛著伍遇有申報逃故或選退釋放正軍即將事故年月日期填註實除簿內隨行該衛扣糧應勾者造單發勾應豁者照單釋豁衛所不得妄勾姦軍不得抽減 凡

編造冊單萬曆元年題准凡清軍御史務查先令議定冊式照常攢造四冊以備考覈如式另造簡明清冊以備稽查其式仍照原題寬廣各一尺二寸每板縱橫各三格其上格大書軍戶姓名註寫充發解補來歷中格註開戶產軍裝軍丁下格空之待填冊後十年事故下輪攢造則以下格事故歸併上格之末仍空下格以待後填其間或改調分轄者揭名類開冊前不必填格陸續發補者照

名序填冊後四冊照舊解部簡明清冊止存本省不必解部 又按會典凡各營及江操官軍萬曆元年令南京大小教場等營都督等官將各營見操并新題添補軍士挑選膂力驍勇者共足三千人卽以在營三都督統之仍於指揮千百戶內選有謀勇者充把總官責令分投操演聽提督官隨方教練本部不時簡視以行賞罰并將把總以下等官一體賞資如遇有警本部卽酌量事勢委官統領防禦以安地方

萬曆二年准海洋戰功陞賞防守各邊鎮事宜又定京營軍士替補聽征軍官推補之例及守衛軍制 按明會典凡斬獲倭賊領軍官武官自守備把總以下文官自海防民兵同知以下所領五百人部下臨陣斬獲倭賊五名額陞一級十名額加一級領一千人者五名額陞署一級十名額陞實授一級二十名額加一級俱至三級而止萬曆二年題准海洋征戰部下擒斬百名三百名以上如苗蠻山賊例不論海賊倭賊勘是奇功與世襲功非奇者照常陞賞 又按會典入衛兵萬曆二年議准宣大遼東入衛官軍春防限二月末旬到薊防春畢日不必撤放通留過夏聽派隘口以防不虞十月終卽先撤放其遲到半月早放半月糧料抵留過夏之費 又按會典薊鎮防守萬曆二年

題准薊昌二鎮分布兵馬十二路屬各兵備道整飭總兵總督往來調度 遼東城堡萬曆二年題准造空心敵臺兩臺之間用磚與亂石爲牆臺牆相連以便固守 萬曆二年題准保定立車騎二

營 甘肅防守萬曆二年令涼莊遊擊統領西寧上班兵馬赴石灰溝屯駐兼管西南二州通海路

口本城叅將兵馬量勢分撥委官一員駐沙塘川兼管北川紅崖子哈刺只溝防敵深入 寧夏城

堡萬曆二年題准修築寧夏鎮城迤北長城邊牆二千餘丈於中衛舊勝金關築闕蓋房牆裏建堡

築墩屯兵集貨以防他虞就設公館爲監市各官棲止之所見存營堡城九十四座關城六座敵臺

三十五座墩臺五百三十四座關隘三十三座 延綏城堡萬曆二年題准延綏墩臺一墩止軍十

名不能固守邊內險阻可建墩院者仍行增築又於十里之間酌量緩急以爲寨城又題准修建延

綏一鎮三段邊牆六百七十一里墩臺七十五座墩院八座寨城七座石砌大川河口一處土築大

川河口四處石砌河口水洞連臺一座石券關門一座石砌井土築溝口一十七處磚石券大小水

洞閘門八十三處水口四十五處水眼五十一處水道四百二十五處 河南防守萬曆二年議准

睢陳河南汝南三道將額編民壯酌留守城分番赴道團操與大梁河北二道一體施行候一年之

後團練已成仍發回守城將守城之兵取赴團練 山東班軍萬曆二年題准將山東河南二省班

軍卽以本衛本所歸併合一或春或秋定爲一班以地里相鄰管轄近便者但足三千卽屬一都司統領有餘不足於就近衛所隨宜增損上班赴薊防守下班本省操練緝捕盜賊與地方官一體行

事 江西兵馬萬曆二年議准行各道督同府縣掌印官建立操所將各縣鄉兵每於農隙之際冬

季自十月初一日起至十一月終止春季自正月初十日起至二月終止嚴加團練每季終聽各掌

印調集操演 四川防守萬曆二年題准將文印山等十二處各設堡一所每所用兵五百名平蠻

山頂設墩四所腳板崖等十九處各設墩一所每處用兵五十名深溝子等五處每處用兵一百名

分投屯守 廣西防守萬曆二年題准鎮安府湖潤寨共一年思恩各土司一年田州一年江州并

上峽下雷二峒共一年每年共出兵三千名四年一次輪戍省城泗城州一年歸順都康二州共一

年向武奉議二州并上林縣共一年思明府思明州遷隆峒共一年龍英忠州共一年每年出兵四

千名五年一次輪戍梧鎮 凡將軍替補萬曆二年題准錦衣衛將軍千百戶侍衛三十年已上者

兒男許替冠帶總旗將軍侍衛二十年已上者許替校尉二十年以下者止與力士俱止准一輩其

應役三年五年照舊查革永行遵守 凡聽征人馬萬曆二年議准行總協大臣防秋之時將三大營戰車二兵各調撥一枝就令本營將官統領赴薊鎮軍門聽派相應處所屯駐遇有寇變與邊兵併力截殺事竣撤回 凡軍士清查萬曆二年議准各營見操軍勇務令一一著伍影射者聽巡視科道叅究 凡營官推補萬曆二年議准勇士四衛二營各裁坐營官二員止選留二員令其統領開操除直宿外餘日著實訓練 又按會典凡守衛官軍萬曆二年議所選汰俱行職方司將清勾解到軍人驗補 凡皇城四門廚房萬曆二年題准旗手等二十衛守衛軍士每月將見在守衛直宿官軍實數并實支月糧文冊二本赴司掛號一本轉送戶部撥倉支糧其官軍該班不得支糧者候下班補給 又按會典僉解軍妻萬曆二年題准解到新軍內有雇覓妻偶者審出將妻變價入官或配與別衛無妻軍人

萬曆三年許保薦運官陞賞番賊功次又鎮戍各營募兵衛兵守兵諸制及操營將領優處推補例按明會典凡漕運把總等官萬曆三年題准把總官運糧三年以上果廉能幹濟依期完糧許各該衙門據實保薦准令於實職上陞一級其運官依期過滿洪完納巡倉御史據實獎薦卽行賞賚

仍擬陞署職一級過洪後期完納依期者通候三年准陞署職一級凡經薦舉運官兵部卽行紀錄
候陞遷日破格優敘若先犯降級不係侵欺掛欠許將所陞職級准復原降之數若見有漂流并未
掣通關者不得濫舉 又按會典凡蕃賊功次萬曆三年題准陝西蕃賊功次如成化中例陞至三
級而止餘功扣賞又一人爲首二三人爲從擒斬三名題爲首者陞署一級爲從加賞陣亡者陞一
級征傷者量賞其不願陞者驗果壯大首級每顆賞銀十兩幼男婦女俱照舊例給賞 凡斬獲蕃
賊領軍官萬曆三年題准千總領五百人部下斬獲三十名題陞一級領一千人者六十名題陞一
級把總領五百人部下斬獲十五名題陞一級領一千人者三十名題陞一級俱至三級而止除叅
遊以上不許報功外其千把總等官果係奮勇當先親自擒斬紀功官隨軍紀驗明白者一體敘論
凡斬獲倭賊官三年題准都司叅遊守備以上仍前不許報功若把總以下將領果能身先士卒
破敵摧鋒斬獲首功爲衆知見者准照級陞賞 又按會典薊鎮募調兵萬曆三年議准募浙兵三
千人各給烏銃令赴薊鎮以備衝鋒攻擊又議准昌鎮置車營 大同入衛兵萬曆三年題准留一
枝暫免入衛 延綏城堡萬曆三年題准延綏榆林神木定邊靖邊四道築空心敵臺見存城垣六

十二座民寨堡城一百四十九座寨城五十五座空心敵臺二百三十九座敵臺一百一十六座墩臺一千三百一十六座 甘肅防守萬曆三年題准如過莊浪西寧有警河州將官由弘化寺應援蘭州將官過金城入住蘭州策應凡河東堡寨之在河西者甘鎮亦卽一體發兵堵截 山西城堡萬曆三年題准山西三關惟偏老沿邊地方自蕨菜郭起至老牛灣止邊長一百一里有零添設磚包空心樓一十五座土築敵臺二百一十六座仍通修邊牆務高堅如法堪以拒守見存城堡墩臺隘口并空心敵臺三千七百一十一處 山西防守萬曆三年題准水泉營外通板升建立市場三關此爲要害將平陽潞州二衛原備禦大同今掣回班軍內各撥五百名分爲兩班平陽衛以九月起潞州衛以三月起見面交替聽守備管領同本營堡軍人併力防守 南直隸防守萬曆三年題准南直隸自吳淞以至金山其中寶山川沙南匯青村柘林皆臨大海倭寇隨處可登青南二所尤當其衝清查各衛所軍舍選一千名委指揮二員分領於青南二處與川柘二總分作四枝汛時聽叅將操練於南匯其各軍行月二糧亦當加厚遇警對敵許照北邊事例但以血戰爲功不以損軍爲罪又令蕪湖縣築城以便防守徽寧兵備道照蘇松淮揚兵備例增設兵額應天治中移駐新江

口太平同知移駐蕪湖和州同知移駐泥汊境內州縣巡司官兵盡屬統率查點又令每年防汛畢日准照防邊事例將各鎮將官及海防同知沿海州縣正官分別舉劾凡優處官軍萬曆三年題准京營號頭指揮等官但有干連官軍及承告軍官不公不法等事須要密切實封奏聞不許擅自勾問其軍職并土官有犯強盜人命等項真犯死罪者先行該管衙門拘繫備由奏提凡營官推補萬曆三年題准四衛營坐營官缺推補原屬兵部於四衛指揮等官內選用其御馬監官止提督操練不得干預止聽其開具相應官員送部查訪疏請如或不堪聽於京營大號頭中軍千總及京衛掌印官內另選廉幹官照缺推補凡拖欠屯糧降級萬曆十三年題准降二級者完報之日復原職不許補支俸糧

萬曆四年定官軍各項獲功陞賞又防守各邊鎮事宜及京營軍官守衛軍士之制按明會典凡逃回人口萬曆四年題准守備備禦等官招徠人口照舊以三百名陞一級分守叅遊各官倍之副總兵係加銜仍管分守叅遊事者如叅遊例協守副總兵八百名鎮守總兵官一千名准各陞一級然亦止陞一級多者與不及數者各照前數以三分爲率二分以上者加賞一分以上給賞半分以

上量賞其各該招徠人口止令解赴該管兵備道驗發該道季終類報巡撫歲終類題覆行巡按御史查弔各道卷或就近摘拘數名審覈明實題請加恩 凡南方蠻賊萬曆四年議定征山斬從賊首一顆賞銀一兩生擒者二兩不願賞者每三功當一級斬有名小賊首一顆賞銀十兩生擒者一十五兩不願賞者每二功當一級若斬奏內有名大賊首者賞銀二十兩生擒者三十兩不願賞者陞實授一級 凡奪回被擄人口萬曆四年議定無論水陸官軍但有臨陣擊敗賊夥奪回被擄男子成丁強壯者每名賞銀一兩十五歲以下并婦女每名賞銀五錢通計部下奪回被擄至一百名口者本管將官守備以上陞署一級三百名口以上實授一級不及數者不陞 凡舉監生員吏承人等獲功萬曆四年議定鄉官舉人監生生員省祭吏承人等統率鄉夫殺賊設謀出奇調度及親自臨陣斬獲首級者照例一體陞賞 凡陣亡萬曆四年題准指揮使陣亡者除給卹典襲祖職外仍取次男或次孫一人與做冠帶總旗查係生前有功死難獨操者與做試百戶俱世襲 凡蕃賊功次四年題准一人爲首二人三人四人爲從斬首二顆爲首給賞爲從量賞一人爲首二人三人爲從斬首一顆爲首量賞爲從不賞 又按會典薊鎮入衛兵萬曆四年議定遵化民兵一千五百

名每名徵銀一十二兩共一萬八千兩解兵備道充餉山東民兵一枝內馬兵一千名每一名匹徵銀二十四兩步兵二千每一名徵銀一十六兩共五萬六千兩解薊鎮充餉遼東入衛民兵三千名止發二千五百名赴薊鎮分布其五百名留寧前防守 薊鎮募調兵萬曆四年又添調南兵九千名以代客兵專備守臺又議淮南兵分爲二班挨定年限至期更番卽以舊將統領舊兵往回行浙江巡撫知會在薊在浙將領不必互換又題准薊昌二鎮應修邊牆九十餘里添築墩臺五百座遼東城堡萬曆四年題准定遼右衛原設於遼陽後因險山設叅將改建於鳳凰鎮設倉建學今展拓寬奠六堡移駐叅將衛治倉學俱遷寬奠就近管轄 甘肅土軍萬曆四年題准莊浪食糧土軍七百人族類多至二萬協守土官不能鈐束令五旗地方添設防守土官一員聽督撫官於土官內選委聽該道填註賢否與漢官一體考察其十旗仍各設社學俾莊浪儒學生員教訓土人子弟湖廣城堡萬曆四年題准瀏陽縣之大圍山平江縣之連雲山俱谿徑縈迴密邇盧源諸峒盜賊往往遁逃其中梅子園逼近大圍山金鋪觀及連雲賊必經之地將瞿家寨巡檢司移駐梅子園添設一堡於大圍山附近所在用把總一員備禦添設一小堡於金鋪觀撥岳州衛指揮一員哨守悉聽

本總節制 湖廣防守萬曆四年議准將荆右二衛原戍靖州班軍三百五十名退回荊州守衛遺

下二衛實在減班并逃故軍數各該行糧扣貯倉庫募增民兵防守其襄陽枝江原戍清浪臨武二

哨照舊存留仍通行鄖陽川貴南贛各巡撫一體查照施行 廣西防守萬曆四年議准東蘭南丹

那地三州每州出兵五百名專戍柳州每年於九月初旬上班二月放回各州敢有遷延不服調遣

及兵不足數者俱聽參究 南直隸防守萬曆四年題准寶山界於川沙吳淞之間爲全吳南北中

路地形突出海島倭船必經要害當守改築城堡而以協守所官軍守之每年汛期副總兵統兵移

駐 凡考閱萬曆四年議准該營千把總員缺總協大臣今後查巡視科道疏薦者酌量題請充補

未經疏薦者不得濫用又議准今後京營將領年資果深與才堪邊鎮者與邊將相兼推用或才不

宜邊鎮歷一任至六七年者聽總協大臣查其才識卓越操履無虧者指實具奏兵部題請加恩

又按會典凡守衛官軍萬曆四年議准圍軍逃故卽呈巡視等衙門著該營衛設法挨拏正身並勾

其戶丁代替如果正身無獲別無戶丁方許照缺於官軍等三大營選補各該管把總等官逃軍十

名以上者俟年終聽巡視等衙門一體查叅重究 又按會典凡改編調衛四年題准將廣東廣西

見奉單勾應解外省軍丁并兩廣互相充發途出千里之外者在萬曆四年四月以前逃者通行清
出會同巡撫衙門酌編本省各衛所充伍行文各該衛所開豁原伍其以後逃者務盡本法清勾不
得援此爲例

萬曆五年奏准薊鎮遼東廣東廣西湖廣四川諸防守之制又改京營家丁名色爲選鋒專官訓練
及贈旗軍舍餘陣亡者子孫 按明會典薊鎮募調兵萬曆五年題准保河二府入衛民兵三千名
每年徵工食銀四萬一千六百兩解軍門召募土兵二千名每名月給糧銀一兩安插撫恤常川在
三屯營操練 萬曆五年題准遼東入衛兵留寧前防工將真定標營一枝代遼入衛 廣東城堡

萬曆五年題准羅旁東西兩山週遭千五百里田地饒沃且有藤蠟諸利將瀧水縣改爲羅定州徑
隸廣東布政司黃姜峒大峒二處各築營城一座各屯兵一千選委指揮充爲把總駐劄許其便宜
撫勦各峒地方通屬管轄其南鄉富霖封門函口四處各立一所卽地立名請給印信各築所城一
座以備防守 廣東防守萬曆五年議准富霖千戶所添設叅將撥兵三千名內分一枝戍守南鄉
函口千戶所添設叅將撥兵三千名內分一枝戍守封門陽電海防叅將兼陸路陽江恩平等處